

Inuusuttut suliffissaaleqisut ikilisarnissaanut suliniarnerup annertusarnerani qanoq ililluta politikikkut suliffeqarfiit innuttaasunik tapersersortarialinnik suliffissaqartitsisut siuarsarsinnaanerigut apeqquaqat aallavigalugu oqallinnissamik siunnersuut.

(Inatsisartunut ilaasortaq Margrethe Thårup Andersen, Demokraatit)

Akissuteqaat

(Inuussutissarsiornermut, Aatsitassanut, Nukissiutitut, Inatsisit Atuutsinneqarnerannut Naligiissitaanermullu Naalakkersuisoq)

Sammisamik pingaarutilimmik, naleqquttumillu oqaluuserisassanngorlugu siunnersuuteqartup qaqitsineranut qujanaq.

Ataatsimoornitsinnut kikkut tamat peqataasutut misigisimasunik, tapersiissutigisinnaasaminnullu tapersiissuteqartunik inuiaqatigiinnik pilersitsinissaq Naalakkersuisunut pingaaruteqarpoq. Tamanna pillugu inuusuttorpassuit suliffeqannginnerat, ilinniakkamik ingerlatsinnginnerat, allatigulluunniit suliaqannginnerat ernumanarpoq.

Tamassuma aaqqivigineqarnissaa ataatsimut akisussaaffiuvoq, akisussaaffillu inuusuttunuinnaq ingerlateqqiinnarsinnaanngilarput. Suliffeqarfiit innuttaasunik tapersersortarialinnik suliffissaqartitsisut, suliffissaqartitsiniarnermi suliniutitut allanut sunniivigeqatigiissillugit aaqqiissutissanut tapersiisinnaallutik sakkussaqipput.

Suliffeqarfinnik innuttaasunik tapersersortarialinnik suliffissaqartitsisunik pilersitsinissamut inatsisitigut sinaakkutit ukiualuit qaangiummata pilersinneqareerput. Ullumikkulli suliffeqarfittut innuttaasunik tapersersortarialinnik suliffissaqartitsisutut nunami nalunaarsorsimasoq ataasiinnaavoq.

Suliffeqarfinnik innuttaasunik tapersersortarialinnik suliffissaqartitsisunik pilersitsinissamut allaffissornikkut akimmiffiit soqutiginneerutsitsinnginnerut qulakkeelumallugu sunik akimmiffeqarneranik, suliffeqarfinnullu innuttaasunik tapersersortarialinnik suliffissaqartitsisunik pilersitsisarneq qanoq siuarsarsinnaaneripput pillugu qulaajaasussamik Naalakkersuisut siorna illup iluani suliamik aallartitsipput.

Tassunga atatillugu nalunaarsueriaaseq, nalunaarusiornissamut piumasaqaat aamma inatsit ajornaallisarneqarsinnaanersut, suliffeqarfinnullu innuttaasunik tapersersortarialinnik suliffissaqartitsisunik pilersitsinissamut, ingerlatsinissamullu soqutiginninneq qanoq annertusarneqarsinnaanersoq ersarinnerusumik misissorneqassaaq.

Naalakkersuisut isumaqarput, ilaatigut ilisimasanik avitseqatigiittarneq pillugu suleqatigiinneq nukittorsarsinnaallutigut, peqatigiillunilu ineriartortitsinissamut periarfissat

qulaajarsinnaallutigit nunat sanilerisagut, matumani Canada, Savalimmiut aamma Island ilanngullugit, suleqatigalugit suliniutissatut periarfissat misissugassaqqissut.

Pisortat, nunallu immikkoortortaanni ingerlatsisut assingusumik sulianik, uani inuttut inissisimaneq inuussutissarsiutinik ingerlatsinernut ataqatigiissillugit ingerlatsinermik misilittagaqartut imaluunniit tapersersuisimasut akuutissallugit naleqqutissaaq.

Massakkut inuussutissarsiutinik siuarsaanermi aaqqiissutaatigut, suliffeqarfiillu innuttaasunik tapersersortarialinnik suliffissaqartitsisut siuarsarnissaannut sunik tapersiissuteqarnissaminnut periarfissaqarnersut Naalakkersuisut ersarinnerusumik aamma misissorusuppaat. Tassunga atatillugu assersuutigalugu ilitersuisoqartitsinerit aqputigalugit inuusuttut akuutinneqarpata, aaqqiissuussaanerit kajujuummisitsisussat assigiinngitsut ilaatinneqassanersut ersarinnerusumik misissornissaanut periarfissaqassaaq.

Kiisalu siunissami EU-mit tapersiissutaasinnaasut, suliassaqarfiup ineriartortinneqarnissaanut aamma eqqarsaatigineqarsinnaapput.

Nunami ingerlatsisunik oqaloqarnitsinni misigisimavunga, suliffeqarfinnik innuttaasunik tapersersortarialinnik suliffissaqartitsisunik ingerlatsinermut ilisimasat annertusarneqarsinnaasut.

Taamaalilluni suliffeqarfimmik taamak ittumik ingerlatsineq qanoq isumaqarnersoq siunnerfilimmik paasisitsiniutigissallugu pisariaqartinneqarpoq.

Suliffeqarfiit innuttaasunik tapersersortarialinnik suliffissaqartitsisut ataani Atuisartoqarnermut Unammilleqatigiinnermullu Aqutsisoqarfimmi nalunaarsorneqarneq qanoq iluaqutitaqarsinnaanersoq ersarissarneqassaaq.

Suliniutit piviusut ukiuni tulluittuni pilersinneqassasut pilersaarutaavoq.

Taamatut oqaaseqarlunga sammisaaq pillugu oqallilluarnissaaq Naalakkersuisut qilanaaraat.